

Goibekokale

ELGETA / Barikua / 2005eko uztailaren 22a / 236. zenbakia

KOORDINATZAILEA: Irati Agirreazaldegia • Barrenkalea 33 BERGARA 20570 • Tel.: 943 76 03 97 • Faxa: 943 76 29 77 • Posta elektronikoa: goibekokale@goiena.com • Lege gordailua: SS475/95

Urtebetean 75.000 euro inbertitu dituzte Espaloia Kafe Antzokian kultur ekintzetan

IRATI AGIRREAZALDEGI

Espaloia Kafe Antzokia zabaldu zutenetik urtebete pasa denean, bertako arduradunek urtebeteko jardunean izandako esperientzia azaldu dute. Bide batez, datorren denboraldirako antolatu dituzten hainbat ekitaldiren berri ere eman dute.

Herriko eta ibarreko jendearekin konpartitu nahi izan dute Espaloioek urtebeteko balantzea.

Hasiberriak izanik, hainbat hanka-sartze egin dituztela aitortu dute: "Horrelako proiektu batean berriak gara asko. Horrek eragin ditu hanka-sartzeak; baina pozak gehiago izan dira eta horiek estali dituzte akatsak", esan du Iban Arantzabalek.

ARTISTAK ETA IKUSLEAK

Artista asko eta onak pasa dira Espaloitik. "Gustura gaude artistei emandako tratutik jaso dugun erantzunarekin. Gainera, aretoa ongi egokituta dagoela esaten digute", diote antolatzaileek.

Ikusleei dagokienez, 13.000 eta 15.000 bitartean izan dira ordainpeko ekitaldiak ikustera joan direnak. "Danbakak gazte jendea ekarri du eta hainbat antzerkitan aretoa bete egin da".



Gorka Arizmendiarieta Espaloiko langilea eta Josu De Vega eta Iban Arantzabal kultura taldeko kideak.

Umeek ere badute lekua Espaloian eta aurrerantzean ere hala izatea nahi dute. "Umeak etorkizuna izanik mimatu egin nahi genituzke. Euren txotxongiloak, ikastaroak... gertatuko ditugu eta zinema emanaldiekin ere jarraituko dugu".

Urtebetean kultura ekintzetan 75.000 euro inbertitu dituzte Espaloian; honetaz gain, Udalarekin zein beste zenbait taldeekin elkarlanean antolatutako ekintzak daude. "Urtebetean 31.000 euroko zuloa egin dugu, baina tabernak eta jatetxeak ematen

dituzten etekinekin estaltzen joango gara pixkanaka".

DENBORALDI BERRIRAKO EKINTZAK

Espaloiairen helburua da antolatu dituzten ekintzekin jendeak gozatzea. Horretarako, kudeaketa zorrotzagoa egingo dute, bai-

na kalitatea jaitsi gabe.

Dagoeneko gertatzen diren denboraldirako programazioa, eta hainbat antzerkiren berri eman du Josu De Vega kultura taldeko kideak.

Irailan, *Cocidito Madrileño* antzezlan ezagunarekin hasiko da denboraldia Espaloiak. Bestalde, Espaloiak izen handiko Yllana teatro konpainia kontratatu du, eta hark urrian 666 lana eskainiko du. Azaroan, Zanguango taldearen *Pan con pan* antzerkia egongo da ikusgai; Max antzerki saria eskuratu duena. Pirineos Jazz Orquestaren emanaldia ere izango da azaroan.

Hainbat konpainiak antzerki lan arrakastatsuak plazaratuko dituzte berriz; eta horietako batzuk Elgetara ekarriko dituzte: *Todo sobre Shakespeare, o casi* abenduan izango da Espaloian.

Urtarrilean dantza ikuskizuna izango da Kukai eta Ttanta-ka taldeen eskutik. Otsailean, Yllanakoak izango dira berriz *Olympiaff* lanarekin; eta martxoan Ttanta-ka *El florido* pertsil egongo da.

Apirilean, aurtengo arrakastaren ostean, berriz ere egin nahi dugu magia mostra. Eta azkenik, maiatzeko asteburuetarako, Udalarekin elkarlanean, kaleko ikuskizunak antolatu nahi ditugu.



Fo-fo-fo Ipintzan txapelketako garaikurra

Ipintzako txapelketako garaikurra Elgetan da. Barikuan Tito's Getokuak taldea hasi zen irabazten; 20. minuturako bi gol sartu zituzten. Lehen zatia amaitu aurretik lehen gola egin zuen Fo-fo-fo taldeko Juaristik. Bigarren zatian Koldok jaurtitako penaltiak berdinketa ekarri zuen; eta partidua amaitzeko hamar minutu falta zirela Ormaetxeak sartu zuen elgetarren hirugarrena. Azken emaitza, beraz, 3-2. /I.A.

LABUR

Aldaketak Eibarrerako autobus ordutegian

Uztailaren 24tik irailaren 4ra bitartean astegunetan ez da Eibar-Elgeta-Eibar autobus zerbitzurik egongo. Domeketan eta jaiegunetan 12:00etan eta 19:00etan irtengo dira autobusak Eibartik; Elgetatik 13:00etan eta 19:30ean. Irailaren 5etik aurrera domeketako ordutegia bera izango da. Aste barruan 13:30ean eta 20:20an irtengo dira Eibarren, Elgetan 14:00etan eta 20:50ean.

APARKALEKUAK

Domingo Iturbe kalean eta Berraondokuan aparkalekuetako marrak margotuko dituzte

I.A.
Oraindik data zehaztu gabe badago ere, abuztuan edo irailean aparkalekuetako marrak margotuko dituztela jakinarazi digute Udaletik. Herriko bi gunetan egingo dituzte lanok: Domingo Iturbe kalean eta Berraondokuan, hain zuzen ere.

Domingo Iturbe kalean, gaur egun, ibilgailuak aparkatzen dituzten arren, gidariek ez dituzte modu egokian lagatzen, bakoitzak nahi duen bezala eta gainontzeko autoak errespetatu gabe baizik. Horrek kexak ekarri ditu kaleko bizilagunen partetik.

Behin marrak margotu ostean, Udaletik espero dute ibilgailuak behar bezala aparkatzea.

APARKATZEKO GUNEAK APROBETXATUZ
Bestalde, Berraondokuan, atzeko kaletik industria gunearen gaineko garajeetara doan bidean, ibilgailuak noizean behin baino ez dituzte aparkatzen.


Udalak, marrak margotuta, lortu nahi du gidariek bertan aparkatzeko aukera izatea, orain arte horretarako erabiltzen ez zen gunea bat aprobetxatuz.

Oraindik ez dakite lan horiek noiz egingo dituzten; baina abuztuan edo irailean izango da. Autoa bertan lagata dutenei jakinaraziko zaie ken dezaten.



Autoak noizean behin baino ez ziren aparkatzen orain arte Berraondokuako zubian.

JAIK



Joxe Agirrek Millan Telleriarekin jardungo du bertsoan astelehenean.

Santixao jaiak asteburuan Goimendin

I.A.
Santiago eguna da astelehenean, uztailearen 25ean. Hori dela eta, santuaren omenez jaiak ospatuko dituzte Goimendi auzoan. Domeka gauean hasi eta astelehenean barrena hainbat ekitaldi izango dira: meza, herri kirolak, bertsolariak eta dantzaldiak, hain zuzen ere.

Asteburu luzea dugu aurrean, astelehena, uztaileak 25, Santiago eguna, jai eguna baita. Goimendi auzoan ospakizunik ez da faltako santuaren omenez.

Domekan, 21:30ean jaiak hasi eta berakatz zopa jateko aukera izango da; eta ondoren Jon Ostoa eta Unai Andonegi trikitilariarekin erromeria.

SANTIAGO EGUNA

Astelehenean, uztailearen 25ean, 11:00etarako meza dago iragarrita; eta ostean, Kezka taldearen dantza emanaldia. 12:00etan herri kirolak: Harkaitz Egaña Mintxeta harri jasotzen eta Fausto Mugertza eta Barberena aizkoran.

Bertsolariak eta trikitilariak izango dira gero: Agirre eta Telleria bertsoan eta Harkaitz Allur eta Lutxurdixo trikitiarekin.

Bazkalostean, 17:30ean, dantza solte erakustaldia egongo da eta bertsolariak berriz jardungo dute gero. 18:30ean nahi duenak bola jokoan jarduteko aukera izango du.

Eguna amaitzeko, gauerdia arteko erromeria izango da Harkaitz Allur eta Lutxurdixoren trikitixak girotuta.

KIROLAK

Pilotalekua itxita egongo da berritze lanak amaitu bitartean

I.A.
Martitzena ezkerro itxita dago Udal Pilotalekua. Berritze lanak aurki hasiko dituzte, eta guztia prest izan nahi dute.

Ohiko erabiltzaileek zortzi edo bederatzi hilabetez ezingo dute bertan jokatu. Gaur egun, hamar lagunek dute izena emanda ordu zehatzetan pilotalekuan jardun ahal izateko.

GAINONTZEKO INSTALAZIOAK

Kiroldegiko gainontzeko instalazioek oraingoz zabalik jarraituko dute. Berritze lanek aurrera egin ahala, ordea, itxi egin beharko dituzte eta kiroldegiaren erabiltzaileei jakinaraziko diete noiz arte egongo diren itxita.



Besteak beste ate berria egingo dute pilotalekuko horma batean.

LABUR

GSR-ren esku Herri Zentroa eta etxez etxe zerbizua

Udalak erabaki du enpresa bakarrak kudeatzea hemendik aurrera Herri Zentroa eta etxez etxe laguntza zerbitzua. GSR (Gestion de Servicios Residenciales) Arrasateko enpresa arduratzen da uztailearen la ezkerro lan horietaz, eta oraingoz urtebeterako kontratua sinatu du Udalarekin. Herri zentroan adineko bost pertsona daude eta hiru lagunek jarduten dute eurekin lanean. Etxez etxe laguntza, berriz, bost familiak eskatu dute eta bi lagunek dihardute haiekin lanean. Udaletik esan digutenez, urtean edozein unetan egin daiteke eskaria bai Herri Zentrorako eta baita etxe-laguntza jasotzeko.



Informazio panelak Aixolan

Kirola egiteko edo paseatzeko bideen berri emanez, bi panel ipini dituzte Aixolako urtegiaren inguruan. Bat Elgetatik joan eta Aixolara iristean ikus daiteke, eta bestea urtegi bidean goazela. Hirugarren bat kiroldegi ondoan ipiniko dute, baina berritze lanak amaitutakoan izango da hori. Foru Aldunditik 4.800 euro inguruko dirulaguntza jaso du Udalak panel horiek ipintzeko. /I.A.